

Date – 20/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Khawvel chhandamna atana khenbeh a nih hnu a mihringte'n chatuan nunna an neih theihna atana Isua Krista a thawhleha ni (Easter Sunday) chu khawvel ram dangte rualin Mizoram pumah hlim taka lawm a ni.
2. I-League Season thar atan Mizoram football club hlun Chanmari FC an inpet tling a, heti hian I-League season tharah Mizoram atangin team 2 an awm tawh dawn.
3. All Mizoram CSS Employees Coordination Committee chuan naktuk April ni 21 ațanga Mass Casual Leave lâk tum an țulh.
4. President Droupadi Murmu leh Vice President Jagdeep Dhankar ten Lal Isua Krista thawhleha ni pualin ram mipui te chibai bukin duhsakna an hlan.



EASTER SUNDAY

Khawvel chhandamna atana khenbeh a nih hnu a mihringte'n chatuan nunna an neih theihna atana Isua Krista a thawhleha ni (Easter Sunday) chu khawvel ram dangte rualin Mizoram pumah hlim taka lawm a ni.

Tukin khawvar hlim khan Chhandamna Sipai Pawl band party-te chuan, "Fak r'u Isua a tho ta," tih hla chu Aizawl khawpui leh khaw hrang hrangah rimawi hmangin an rem a ni.

SFX : Salvation Band Party Ressurrection

Chhandamna Sipai Pawl bakah hian Kohhran engemaw zat thalaite chuan ni chhuah rualin biakin emaw biakin tualah emaw Pathian biak inkhawm an huaihawt bawk.

SFX : Sunrise Service

Catholic kohhran chuan sakhaw hunpui bikah chuan Judate ni chhiar dan zawmin nizan Inrinni khaw thim fel atangin Isua thawhleha Easter hi an lawm tan a. He inkhawm hi Catholic Kohhranah chuan inkhawm zawnga urhsun ber leh ropui bera neih niin zan inkhawmah sathau khawnvar chhi engin Isua thawhleha Easter procession neiin mawmbati kawng an zawh a, Khawvel puma Catholic kohhran te Easter Sunday hman dan hi a inang vek a ni.

SFX : Easter Vigil

Vawiin hian Presbyterian kohhran chuan Pathianni danga Sunday School awm thin kha ti lovin Kohhran pui-ah Isua Thawhleha Ni hi an lawm dawn a. Chawhma inkhawm thupui atan 'Krista an khenbeh kha a tho leh ta' tih a ni a, Chawhnu Inkhawm Thupui atan 'Thawhleha tunah leh nakinah' tih ani dawn a, Zan Inkhawm Thupui atan 'Thawhleha thu hretute kan ni,' tih an hmang thung dawn a ni. Chawhma inkhawm banah Krista Thawhleha ni pualin thingpui ruai buatsaih a ni dawn a, 'Easter Egg' ti a sawi artui cheimawi leh thingpui hmeh hrang hrangte inkhawmhote'n an changho dawn a ni.

Krista Thawhleha Ni hi urhsun leh ropui taka hman thin a ni a. Vawiin Easter Sunday-ah pawh hian kohhran tam zawk chuan ruai an theh dawn a ni.



CHANMARI FC

I-League Season thar atan Mizoram football club hlun tak Chanmari FC an inpet tling a, heti hian I-League season tharah Mizoram atangin team 2 an awm tawh dawn.

Chanmari FC hian I-League 2 season khelh mekah pahnihna dinhmun luahin an hnuai chiaha awmin an phak thei tawhlo a, an dinhmun sawh nghetin pakhatna Diamond Harbour Football Club club nen season tharah I-League khel turin an in hlangkai a ni.

Chanmari Football Club hi kum 2011-a din niin Mizoram Premier League Champion vawi 2 alo ni tawh a, Independence Day Cup ah te pawh champion in Mizoram football ah sulhnu ropui tak a nei tawh a ni.

Chanmari FC Coach Rochhingpuia chuan I-League khel thei tura an inpet kai chu lawmawm atih thu sawiin player te leh coaching staff te thawhrimna a ni a ti a, bultan tur chauh anla nih avangin mipui thlawpna an mamawh zel dawn tih a sawi.

Byte.. Rochhingpuia, Chanmari FC

Hetihlai hian I-League Champion lo ni tawh Aizawl FC President Pu Robert Romawia Royte chuan Chanmari FC in I-League an inpet tling chu a lawmpui thu sawiin Mizo mipuite tana tangkai taka hna thawh chhunzawm zel turin duhsakna a hlan a ni.



MIGOSTU PROTEST

Mizoram sawrkar sikul zirtirtu inzawmkhawm chuan sawrkar laka an lungawilohna lantir nan naktuk April ni 21 atanga ni 25 inkarah an hnathawhna hmunah "Badge dum" an bel dawn.

Mizoram sawrkar school zirtirtu inzawmkhawm chuan sawrkar hmasa in zirna hrang hrang dinhmun sang zawka a hlankai te tuna sawrkarin dan siamthat ngai leh fello chhuanlama a paih chu provincialised status ah dah let an phut an ti a, sawrkar laka lungawilohna hrang hrang tarlangin karleh April ni 21 atanga April ni 25 inkarah an hnathawhna hmunah badge dum an bel vek dawn tih an sawi.

Mizoram Govt. School Teachers Union (MIGOSTU) chuan sawrkar hmasa in dinhmun sang zawka zirna in a hlankaina provincialised status chu tun sawrkar Cabinet thukhawmin a hnawl bakah High School leh Middle School Headmaster kum tam tak lo thawk te zirtirtu pangaia an tlak theihna tur an rawn telh thar an ti a, heng Cabinet meeting in a rel te chu a rang thei ang bera ngaihtuah that leh ni se an duh tih sawiin Provincialised status ah dah let an duh tih an sawi.

MIGOSTU chuan a tehfung an hmanna ah thingtlang leh khawpui inang renga an siam chu diklo an tih thu sawiin, thingtlanga school te tan kaisan ve theihna a awm tawh dawnlo nia an hriat avangin dan thar an siam chu sut leh vat turin an phut tih an sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



AMCECC

All Mizoram CSS Employees Coordination Committee (AMCECC) chuan naktuk April ni 21 atanga Mass Casual Leave lâk tum an thulh.

AMCECC thuchhuah tarlan danin, Sorkar lakah lungawi lohna an lantir mek chungchangah DP&AR Minister Pu K. Sapdanga, Adviser to CM (Political) Pu Lalmuanpuia Punte, CS charge la mektu Pu H. Lalengmawia leh DP&AR hotute nen an thil phut hrang hrang sawi ho anih hnuin an thil phutte tihhlawhtlin dan kawng dappui an tum thu sawiin hei vang hian nimina AMCECC Executive Committee thukhawm chuan Mass Casual Leave chu kalpui tul hrih loah a ngai tih sawiin, Sorkarin an lungawi tawkna ruahmanna tha tak a siam sak zel an beisei an ti a. Hetih rual hian Sorkar hmalakna a vuaicha viau a nih chuan an awm zel dan tur chu Executive Committee in a rel leh ang tih an sawi.

AMCECC thuchhuah chuan sawrkar nen an inbiakna ah dah ngheh an nih theih dan turah ngaihtuahna thar siam anih tur thu te leh mumal taka lak te chu senior dan indawta luh theih dan tur bakah April ni 15 atanga ni 17-a Pen Down Strike an huaihawt chhunga hlawh cut tura sawrkarin a lo tih tawh chu an sut leh tura chak taka hmalak anih avangin Mass Casual Leave huaihawt an tum chu thulh an rel a ni.



AGRICULTURE MINISTER

Agriculture Minister Pu PC Vanlalruata'n naktuk April ni 21 atangin Sorkar-in Sawhthing a lei tan leh dawn tih a sawi.

He thu hi ningani-a thuthar lakhawmtu thenkhatin a Pisa-a an kawmnaah sawiin Agriculture Minister chuan kumin February ni 20 atanga March ni 20 inkarah Sorkar chuan Mizoram hmun hrang hrangah Sawhthing kg.-ah cheng 50-in a lei khawm a ti a, tun dinhmunah quintal 6,222 hralh a ni tawh tih sawiin hralh loh quintal 1,800 vel a la bang a ti a. Sorkar-in Sawhthing a lei khawlte chu auction kalpui ni mah se, a leitu zingah Mizoram lam hawi an tam loh avangin an hralh chak thei lo tih a sawi.

Pu PC Vanlalruata chuan lo neitute manganna chu sorkarin a hria tih sawiin hemi sutkianna atan naktuk April ni 21 atangin Sawhthing chu Sorkar-in a lei tan leh dawn a ti a, hei hi kut hnathawktu, Sawhthing cho lawk tawh ho chhan chhuahna tur a ni tih sawiin, tuna sorkar-in Sawhthing a buaipui ang hi Mizoram-ah a la awm ngai lo a ti a, tuna an buai chhan ber chu an vawi khatna a nih vang tih sawiin tuna an harsatna tawh ang chu nakkum lamah a tlem tawh a rin thu a sawi bawk.



PRESIDENT, VICE PRESIDENT EASTER GREETINGS

President Droupadi Murmu leh Vice President Jagdeep Dhankar ten Lal Isua Krista thawhlehma ni pualin ram mipui te chibai bukin duhsakna an hlan.

Ram hruaitu te chuan Easter Sunday pualin Lal Isua Krista chu hmangaihna leh ngaihdamna thuchah keng tu ani an ti a, a thawhlehma niah hian mi zawng zawng in a zirtirna tha tak tak, nunpui zel turin leh a hnungzui a kawngzawh zel turin mipui te an chah a, hmangaihna leh ngaihdamna nen nitin hun hmang turin an duh thu an sawi bawk a ni. Vawiin Lal Isua Krista thawhlehma ni, Easter hi rampumah Kristian ten an lawm a ni.

